



妹仔賊

看等五月節就愛到咧，恁多子哀踩踩踏踏，毋知愛買哪家个粽仔正好，毋係嫌這家个忒油，毋健康，就係嫌該家个忒鹹，食了作渴，還嫌有兜粽仔無香無氣，米毋係暢(tiong)粒，就係暢綿，食來當畏人。大个俵仔突然問講：「還係姐婆包个最好食。姐婆自家畜个雞仔，肉乜當甜當好食。」佢聽著，目汁強強就會流下來。

見轉外家忒愛轉屋下，阿姆、老弟就會摻佢大包細包个包袱攞落車肚，隔壁鄰舍看著，就笑等講：「你看該妹仔賊愛轉囉，有阿姆還好哪！食著(zhog)就毋使愁。」實在有影，佢姆像大樹樣，分佢抵風遮水，佢企在樹下無愁無慮，年節有板、有肉好拿；閒時有青菜、水果好帶，總愛一少麼个，阿姆就準備齊全，買到便便，有「妹仔賊」好做，還幸福哪！

先先看著阿姆春上春下買該買這，心肝肚乜盡毋盼得，毋過佢知，子女个滿足，就係佢最大个安慰。看著佢做到歡喜暢樂，佢乜當安心做佢个「妹仔賊」。佢長下想，有「妹仔賊」好做，表示佢姆个身體還好，正有體力去完成妹仔个需求；也表示佢姆个手頭還鬆，正有能力為妹仔這買該買；最歡喜个還係表示佢仔、心白盡有孝，阿姆決定麼个，大家就無異議，掄等阿姆為這兜阿姑仔幫幫撥撥，一屋人在阿姆个愛惜下，和和掄掄，快快樂樂，這敢毋係盡好个事情！所以佢兜姊妹，當享受做隻「妹仔賊」，享受爺哀个愛，享受兄弟个情。

逐年官恁到五月節，阿姆就喊去拿粽仔咧，分佢兜先食過願。一到五月節，佢又喊拿粽仔，過隻節，總有兩擺粽仔好食、好拿。阿姆乜毋會毋記得，雞仔愛剛加幾隻，好分三個妹仔帶轉去。阿姆麼个就摻妹仔做到周到周到，到這下，佢就打毋出一隻板、剝毋出一坵雞肉來食，像朋友講个：「你還好命哦！」

舊年年下開始，八十八歲个阿姆，身體殯弱起來，無恁大个元氣好打板、畜雞鴨咧，雖然佢心心念念一群大細會無板好食，佢兜還係毋肯佢恁勞碌。毋過一到年節，佢就特別心焦，懷念阿姆康健个身影、懷念該段做「妹仔賊」个嬌尸。簡簡單單「妹仔賊」三隻字底下，园等阿姆對子女淦淦个愛，乜园等子女對阿姆深深个依賴，佢甘願長長久久做阿姆身邊个「妹仔賊」啊！

作者：張美容

☆詞彙學習☆

【踩踩踏踏】cai cai tab` tab`：比喻猶豫不決的樣子。

【春上春下】zhung` shong` zhung` ha`：到處奔波。

【畏人】vui` ngin：怕人；膩人。

【過願】go` ngien+：過癮。

【先先】sen` sen`：起先。

【殯弱】ngiem` ngiog`：虛弱。

【心焦】sim` ziau`：因想念而難過。

☆文法學習☆

【總愛】zung` oi`。總愛有兩義，一為只要，一為總要。

例1：總愛一少麼个，阿姆就會準備齊全。（只要一少什麼，媽媽就會準備齊全。）

例2：總愛食飽來，正有體力好做事。（總要吃飽來，才有體力可以做事。）